

Izbori mogu osnažiti građane u zahtjevima za reforme

Opći izbori u oktobru nude građanima Bosne i Hercegovine šansu da osiguraju suštinske i pozitivne promjene, rekao je sinoć visoki predstavnik Valentin Inzko na međunarodnoj konferenciji u Mariboru.

“Tokom poslijeratnog oporavka u Bosni i Hercegovini postignuti su značajni rezultati, ali daleko od toga da je sve završeno”, rekao je visoki predstavnik. “Sada čak dolazi do poništavanja tih rezultata.”

On je rekao da su građani odgovorili na rastuću materijalnu i političku krizu “s hrabrošću, dostojanstvom i izvanrednim stepenom energije”, te je istaknuo da “civilno društvo, putem građanskih demonstracija, plenuma i primjera otvorenog i nezavisnog novinarstva, rješava očigledne nedostatke – u pogledu nadležnosti i etike – u političkom životu.”

Ukazujući na činjenicu da “Bosnu i Hercegovinu ne čini nekolicina političkih lidera, već da BiH čine četiri miliona dobro obrazovanih i trenutno veoma razočaranih građana”, visoki predstavnik je napomenuo da se s građanima mora ozbiljno razgovarati, u suštinskom smislu.

“Izbori će biti dio tih razgovora, ali je potrebno i nakon izbora održati dijalog s građanima”, zaključio je visoki predstavnik Inzko.

Visoki predstavnik je učestvovao u godišnjoj konferenciji evropskog društva za istraživanje etičkih pitanja *Societas Ethica*.